

Барча Рамазан барз!

ХХИРАССА ДИНДАЛУЛ УССУРВАЛ ВА ССУРВАЛ!

Дакнихтуну барча буллаи буру циняв бусурман барачатсса Рамазан барз бучавришчал. Ва зурул жува циняв цачлун буллалиссару, архлал бацан буллалиссару. Мискинсса иклу, авадансса иклу, зума дугълагъиссар гъарца бусурманчувнал. Каши думанан дакъаманал хлал бувчлуну, мунаву рахлму-цими ххи буллалиссар. Аьрщарайсса оьрмулул неъматру жунма члумуйнуссар, миннуя багъайкун неъмат ласунгу клулу биклан аьркинссар.

Ххирасса уссурвал ва ссурвал, Рамазан барз – жулва чурх марци буккан байсса барз бакъассагу, бунагъирттая марци шайсса, оьккимуния арх буцайсса барзри. Ва зуруй жула зумату бувккун нанисса мукъул хъирив бавцуну биклан аьркинссару. Жула уссур-ссуннай аьй-бювкьурду дуллалисса ихтилатру буллан къааьркинссару. Мукъул диян дурсса щаву яла-яла цун шаймурди. Ахирданийгу Аллагънал ﷻ хъхъичл цимурцан-

нухлу жавабру дуллантими жувару. Ча тий буру цинявннан ва барз Аллагъу Таабаланаха эбадатрай, зумарду дугълай, дуаьрду дуллаи, Кьуръан ккалай гъан бувансса цуллушиву, лагма-ялттуми ххари буллансса бюхъу. Бусурманнал дурсса цимурца ххуймур Аллагънал ﷻ къамул дуваннав, оьмунил ялтту учланнав! Амин.

Дагъусттаннал муфтий,
шайх Ахлмат-хажу Афанди

Ва номерданий :



Таравих-чак



Лайлатул-Къадрилул хъхъу



Фитрулул закат – Ссахл



Ницлавкратусса шайх Сайфуллагъ-Къади

Шайх Сайфуллагъ-Къадинал щала Аьрасатнал ва Дагъусттаннал халкъуннал оьрмулуву бувгъуссар багъа бишун къашайсса диндалул ва политикалул чулухасса хъунмасса клану. Мунал жунма къабивтсса мюнпатсса диндалул ва элмулул даражалул къимат хлакьинусса кьинигу багъайсса куццуй халкъуннан тивтлуну ва клулу бакъар. Хаснува, лакрал миллатрал агъали клул бангу анавар буклай бакъар. Сайфуллагъ-Къади хъанай ур цала заманнай яла хъунама аьлимчуну ивкисса инсан.

Сайфуллагъ-Къади увну ур 1850 шинал Лакку билаятрай Ницлавккулал шяраватусса Башларовхъал тухумрал Хусайннул кулпатраву. Шайх Жамалуттин куна, вагу ивкун ур Мухаммад-Идавсил ﷺ душнил Фатимал арснал Сайд-Хусайннул наслулиятуса.

Сайфуллагъ чивину уна, ганал нигти-буттан Аллагънал ﷻ чларысса аьламатру, хикматру ккаккан дурссар. Дагъусттаннал шайхтураву Сайфуллагъ-Къадинал бугълай бур ляличисса клану. Сайфуллагъ-Къади ивкун ур Накъшубанди, Шазали ва Къадири тарикъатирттал муршид. Му ивкун ур рувханийсса элмулул залту. Ганал нину Бахтун Ницлавкратусса дурккусса аьлимчунал душ бивкун бур. Сайфуллагъ чивинийва хъинну аькылу бусса, хисав ласайсса оьрчл ивкун ур. Га чыни айивхъуссар личи-личисса элмурду лахълай. Шяраваллил оьрчал чивинийва ганайн «къади» учайсса бивкиссар. Муниятур ганайн Сайфуллагъ-Къади учайсса. Аммарив, мяйжаннугу, 1917-ку шинал оьруснал паччахл Николай II укъан увкун, Темир-Хан-Шурагъ Сайфуллагъ-Къади къадину ацан увссар. Му куццуй арулва зуруй зий ивкиссар, шариаьтрал тлалавшинна дачин дурну, цурк-къачагъшиву чан даншиврул Щу-

рагъу, щалва Дагъусттаннайгу. Арулла шин хъусса члумал Сайфуллагъ цала буттащал Хусайннушал Асттарханнайн лавгссар. Гикку ганал къуртал бувсар оьруснал ва татарнал школарду. Дуклакисса хлаллай шпу ганахъ Исламрал элмулул дарсру дихълай ивкиссар. Ацния мукъра шинаву Сайфуллагълун клулу бивкиссар аьраб, оьрус, татар маз, мий бакъасса мунал клулу бивкиссар яру маз ва бувчлан бивкиссар казах маз. 1866 шинай Дагъусттаннайн зана хъуну мукъах, га дуклай ивкиссар Арчийл мадрасалуву шайх Мамма-Дибирдучла. Шанна шинава, мадраса къуртал бувсса члумал ганан клулу бивкиссар урчла маз. Мунияр махъ Хусайннул цала арс дуклан гъан увсар Кудалиясса Чиви Хасаннучлан. Шикку ванал лавхъуссар мукъва маз: турк, парс, яру ва кьумукъ. Хъиннува куртлну лавхъуссар аьраб маз. ▶▶ 2

Ницлавкратусса шайх Сайфуллагъ-Къади

قادی
سید

1 « Лахълай ивкІссар медицина. Ганияр махъ Сайфуллагъ-Къади лавгссар дуклан Ссугърациял шайх АбдурахІман-ХажиначІан. 1873-1875-ку шиннарди дуклай ивкІссар Ссугърациял мадрасалуву. Лавхъхуссар хъиннува куртІну аьраб маз, исламрал элмурду, Къуръан, хладисру, шариаьт ва тарикъат, гьарта дурссар цала медициналул кІулшивуртту, кІул хъуссар Авиценнал луттирдащал. Цува дуклай ивкІсса шяраваллаву мунайн учайссар бивкІссар «чІявусса мазру кІул инсан», куну (полиглот).

Сайфуллагъ-Къади гьуртту хъуну ур Къуръан буккайс-са конкурсраву Египетнал Къагъир шагърулий. Микку ганал бивгъуну бур цалчинмур кІану. Сайфуллагъ-Къади щала цала оьрмулий личИ-личІисса мазру кІулшиву гъаз дулай ивкІун ур. Ганан кІулну бивкІун бур кьуннир ххишассаласса мазру.

Сайфуллагъ-Къади зий ивкІун ур хІакинну Цахъарав ва шайх Ильяс-ХІажи ЦудахариначІа ялун агъну шариаьтрал кьанунну лахълай ивкІун ур. Гикку ганал лавхъхуну бур дарги мазгу.

1877-ку шинал Сайфуллагъ-Къади ивкІун ур мирзану Гъази-Гъумуксса паччахІнал аьрал бусса къалалул гарнизондалулу. Гикку ганан ккавкссар операцирду буллалисса куц, гарнизондалулу хІакиннан уртту-щиная дарурду байсса куцгу лахъхъин бивссар. Цалчинсса цала медициналул жуж шайхнал «Рецептарный справочник» Гъумук чивчуссар. Му лу бур Аьрасатнал Элмурдал Академиялул Дагъусттаннал филиалданул библиотекалулу.

1877-ку шинал Дагъусттаннай Аьрасатнал паччахІнал Кавказнаву дачин дурсса политикалийн кьарщисса восстание гъаз хъуссар. Восстаниелул сайки щаллагу Дагъусттан бивгъуссар. Амма хъунма хІал къавхъуну га куччу дурссар. Ганивух гьуртту хъуминнан хъунисса танмихру бивссар. Восстаниелул чІумалсса гъазаватравух гьуртту хъуну тІий, Сайфуллагъ-Къади Саратовуллал губерниялийн ссивирувну ивкІссар. Амма ацІаву къакІулсса аьлимчу тийхгу цалла кІулшивуртту ларай дулла ивкІссар.

Буттан кІулсса Татарнал хъун

нисса иширттал залхъхъуннал кумаг бивну, Сайфуллагъ-Къади увхссар зун Саратоврал медициналул центрданийн. Шикку зий бивкІссар немецнал хІакинтал. Мий хъин булла ивкІссар Поволжьелийсса колониялийсса немецтал. Гикку зий уна Сайфуллагъ-Къадинал кьуртал бивссар медициналул училище. Гиву хІадур булла ивкІссар немецтурал колониялий зунсса медперсонал. Цаппара хІаллава га авчуссар немец мазрай дарсру дихълай. Тийх га кІул хъуссар немец миллатраясса хІакинтуращал. Немец мазгу лавхъхъуну, медициналул кІулшивуртту хъиннура куртІ дурссар. Сайфуллагълул Саратоврал госпиталлай зий дурну дур 10-ра шин. Немец хІакинтуращал му Германиянавунгу лавгун ивкІун ур.

1886 шинал Саратоврал медициналул центрданийсса немец-хІакинтурал ганан щаллагу Аьрасатнай хІакинну зунсса ихтияр дуллалисса документ буллуну бур, цувагу яла куртІмур медициналул кІулшиву диркІун дур невропатологиялул.

Сайфуллагъ-Къадинал бивкІссар кІия оьрчІ ва ца душ: Зубайдат, Аслан-ХІусайн ва ХІажи-Абакар. Ми оьрчІал къадар кьурчІисса бивкІссар. Зубайдат жагъилну бунува, азар хъуну бивкІуссар. Чивима арс ХІажи-Абакардул марцІсса ххювардай кьуртал бивссар Темир-Хан-Щурагъиял реальное училище. Га уххан чай ивкІссар Петебургулчал горный институтравун. Дяъви нанисса чІун дунутІий, Сайфуллагъ-Къадинал маслихатрайн бивну, мунал хІукму бивну бур Къазаннал мединститутравун дуклан уххан. Амма кІул бакъа бала ялун бивну, бяливчІссар ганал оьрму. 1916 шинал гъинттул буттал шяравун увкІсса ХІажи-Абакардул ттупанграл кьуннагъ чайн щуну, ттупанграву ккулла бушиву къакІулулу, пІякъ увкуну, цайнма ччаннайн щуну, куртІсса щаву хъуну дур. НицлавкІрав иянин хъунмасса хІал хъуну бур ахътта най. Ахиргу ххассал ан къавхъуну ивкІуну ур. ХІажи-Абакар увчуну ур цала буттал шяраву.

Хъунама арс Аслан-ХІусайн дуклай ивкІун ур Ссугърациял мадрасалулу. Мадраса кьуртал бивну махъ гиккува зий ивкІун ур муаьллимну



Шайх Сайфуллагъ-Къади Башларов

ца шинай. Яла зий ивкІун ур хъунмасса хІаллай Кьукуннал мадрасалулу, га лакъиннин. 1926-ку шинал Кьукуннал мадраса лавкьуну махъ, Аслан-ХІусайн зий ивкІун ур юзбашину цала буттал шяраву 1928-1930-ку шиннарди. Репрессиярдал чІумал яхъанай ивкІун ур Дянивмур Азиянаву. Цаппара хІаллай гиккугу яхъанай ивкІун, зана хъуну ур шавай 1933-ку шинал. НицлавкІуллал шяравалу дизан дурну дур Цуссалакрал райондалийн 1944-ку шинал. Иззун ур гиккун Аслан-ХІусайнгу цала кулпатращал. Цала оьрмугу гъан бивну бур цІусса кІанттай. Аслан-ХІусайн увчуну ур Цуссалакрал райондалий, цала цІуну хъусса НицлавкІуллал шяраву. Шайх Сайфуллагъ-Къадинал (къ.с.) кьариртун дур хъунасса шариаьтрал ва тарикъатрал кІулшивуртту, цала каних чивчусса жучІанма бивсса медициналул ва диндалул луттирду. Мунал яла агъамми давургту хъанай дур: «Канзулл маъриф», «Мактубат» ва «Мавакьифу-с-садат». «Канзул маъриф» тІисса луттираву хъинну ххуйну ккаккан бивну бур цияв тарикъатрал ишру, яла-яла гьартану буслай бур Накъшбанди

тарикъатрая. «Мактубат» тІисса луттираву шайх Сайфуллагъ-Къади буслай ур Накъшбанди ва Шазили тарикъатрая, ва цала муридну ивкІсса КахІиблиясса шайх ХІасан-Афандинал суаллахъхъун жавабругу дулла ивкІун ур. ХІакъинунин яхъуну бур мунал цала каних чивчусса инсан хъин аврил справочник, цанагу га лу къамул булла ивкІун ур хІакъсса медициналул ххуллий. «Мавакьифу-с-садат» тІисса луттираву шайх Сайфуллагъ-Къадинал чивчуну бур Аллагъу ТааьланачІан гъан шайсса ххуллурдая. Сайфуллагъ-къади кунмасса шайхтал хъанхъиссар дакІнил марцІ хъусса инсантал ва мунаяту Аллагъу рязисса, дакІнин асар хъунну бусан шайсса инсантал. Накъшбанди тарикъатраву Сайфуллагъ-Къадинал устаз ивкІссар шайх МухІаммад Закир аль-Чистави. Му яхъанай ивкІссар Чистополь тІисса татарнал шагърулий. МухІаммад Закир аль-Чиставинал бивкІссар чІявусса мюридтал. Ца кьини ганал бавтІуну бур яла хъхъичІунми 500 аьлиментал ва мюридтал. Гайннал хъхъичІун уккан увну Сайфуллагъ-Къади, увкуну бур: «На ттула шайхшиврул изну

буллай ура ванахъхъун», –куну. Гиккун бавтІусса аьлиментал цІувххуну бур: «Хъунмасса хІаллай жу буссияввил чІарав, жуяту цуцІав къавуцІуну, дахъа увкІсса Дагъусттанчу циван увчІав?» –куну. МухІаммад-Закир Чиставиналгу увкуну бур: «Аллагънал кьадарданийну вана хъуннай ур хъинну хъунмасса даражалул шайх», – куну. Цала устаз накълу шайхтту Сайфуллагъ-Къади дуклай ивкІун ур Зайнуллагъ Шериф РасулначІа Троицкалий. УрчІва барз бивну бур Сайфуллагълул ганачІа дуклай. Яла шайх Зайнуллагъ-Расул Шарифлул бавтІуну бур Дянивмур Азиянал, Башкирнал, Татарнал диндалул аьлиментал ва баян бивну бур Сайфуллагъ-Къади хъушиву Накъшбанди тарикъатрал муршид. Гай махъругу увкуну, ганал хъачІунттайн халиф АьлиасхІаблул хялат дуртун дур. Цияв бавтІминнахъ увкуну бур: «Явара личІулуну бики, Сайфуллагъ-Къадиная хІурмат къабуну къаличІан», –куну. Га хялат ва тарикъатрал ххуллу бивссар ЧиркІейлиясса Саэд-афандиначІан (къ.с.).

Яла Сайфуллагъ-Къади дуклай ивкІссар шайх МухІаммад Муррад МанзавилучІа. Хъунмасса хІал къавхъуну шайхнал ганая увссар Къадири тарикъатрал муршид. Астарханнайн лавгсса чІумал Сайфуллагъ-Къади хъунавкьуссар шайх МухІаммад СалихІ аль-Маданилушлал. Шайх МухІаммад СалихІлул ганая увссар Шазали тарикъатрал муршид. Цалчин Шазали тарикъат Дагъусттаннайн дуркІссар Сайфуллагъ-КъадиначІал.

1904-ку шинал Сайфуллагъ-Къадинал сакин дурну диркІун дур «Бусурман цачІун шаву» тІисса ккуран. Сайфуллагъ-Къади увчІуну ур хІукуматрал Государственный Думалувун. Тава чІумал Сайфуллагъ Египетнаву Къагъиралийсса Аль-Азгьар университетравунгу ивссар. 1909-1919-ку шиннарди Сайфуллагъ-Къади ивкІссар Дагъусттаннал ва Ухссавнил Кавказрал цалчинма муфтийну. 1917-ку шинай арулва зурул мутталий Темир-Хан-Щурагъ Дагъусттаннал Шариаьтрал судрал председателнугу зий ивкІссар. Щурагъ ваначІан бучІайсса бивкІссар халкъ личИ-личІисса цала иширттай. ► 7

Учредитель

Благотворительный фонд «Путь». Газета печатается по согласованию и одобрению Духовного управления мусульман Дагестана

Редакционный совет

Председатель редакционного совета муфтий РД
Ахмад-хаджи АБДУЛАЕВ
заместитель муфтия РД
Махди-хаджи МУТАИЛОВ

Главный редактор

Заурбек (Абдулла) ЯИКБАЕВ

Редактор

Иса ОМАРОВ

Канонический редактор

Курамухаммад МАГОМЕДОВ

Менеджер

Абдусабир АХМЕДОВ

Дизайн, вёрстка

Мухаммад МУСАЕВ

Газета зарегистрирована Федеральной службой по надзору в сфере связи, информационных технологий и массовых коммуникаций.

Свидетельство о регистрации ПИ № ФС 77-37006 от 29 июля 2009 г.

При перепечатке ссылка обязательна. Набрано и сверстано на компьютерной базе газеты «Ассалам».

Отпечатано в ООО «Дом печати» по адресу: пр-т Акушинского, 20

Заказ №

Тираж 3150 экз.

Сдано в печать 28 июня 2013 г. в 16:30

Индекс 51388

Адрес редакции

367015, РД, г. Махачкала, ул. Аскерханова 13а.
Тел.: (8722) 51-85-22.

По вопросам подписки и доставки обращаться по телефону: 914-222, 8-988-291-42-22.

E-mail: assalamlak@mail.ru

www.assalam.ru

Зума дугъаврил даража

Зума дугъаву – Имандалул мукъва бутлун ца бутлар, ссавурданул дачлур, эбадатрал килулар, тлаабгирттал, хъинбаларттал гъанур, Аллагъначан ۞ гъан шаврил ххуллури.

Мунивусса фазилартту, хъиншивуртту чявуссар. Цайми эбадатирттал аьмаллу халкъуннан ккаккайссар, члалачиссар, килу шайссар, зумарив

Аллагънан ۞ дакъа къачлалачиссар, цаманан килу къашайссар. Му батинийсса, къюлтисса аьмалли, Занная ۞ нигъа увсмалал дакъа зума къадугъайссар, Занналгу ۞ лагъналгу дянивсса эбадатри. Мунийну чурххал шагъват гъагъайссар, дакнин гъава лещайссар, Аллагъ ۞ дакнин агъайссар, щяйтлан-иблис арх шайссар, эбадатрайн гъира багъайссар. Къиямасса

Къини халкъ бизан бувукун, Аллагъу Таабланал учинтиссар Ризванухъ – Алжаннул ялув ацлухъ: «На зума дугълай бивкисса халкъ гъатта-вагу мякъну, ккашилну бизан бав, миннанмур Алжаннава дучлан да» – куну. Яла Ризваннул оьвкуну Алжаннул къуллугъчитурайн: «Нурданул тлабакъру, ланжартту дурцлуну Алжаннул ахълсри, хлачия ласияра», – куну, мий ларсун бучлантиссар.

Рамазан зурул ххирашиву

Рамазан зурул хъхъичлра-хъхъичсса хъху дуркфукун, Алжаннул хъулурду тивтлуну, му барз гъаннин къалакъайссар. Дуржагърал хъулурду лавкъуну, му барз гъаннин къатитлгъайссар. Щяйтлантал байшун байссар, иблislуь къатла бишайссар. Ливтлумий ххари шайссар, утгавамий рахлат шайссар. Оьшивуртту къачичайссар, хъиншивуртту ацлийну чичайссар. Буцири бунагъирттал аьпа байссар. Аьзаврая ххассал байссар.

Рамазан – хъинну барачатсса барзри. Муниву бувсса ца фаризалул чири, цамур зуруй бувсса арулцлалуннилуксса буссар. Мунивусса фазилартту чяруссар, хъиншивуртту, хъуншивуртту чяруссар, цайми зурдардивунир гъарзассар. Му зуруй дурсса дуаблухъун Аллагъу Таабланал жаваб дулайссар, садакъа къамул байссар, тлаабтру ххирассар, эбадат къамулссар, ливтлумий неьматравуссар. Хлатта, мунивусса гъарца ссятраву царан хлак хъусса ряхтуршазара инсан тархъан итайссар. Щалва зуруй тархъан бивтссаксса ца Лайлатул-Къадрилул хъхъуну тархъан битайссар. Мий цинявуксса ца Зума ритавал байранналул къинигу тархъан битайссар. Зурул махъра-махъсса хъхууну ссаврду, лухччив, малаиктал аьтлун биклайссар, ххирасса умматиннан мюнпат бусса барз лагаврий. Мунил дайдихъу – цимири, дянивалу – бунагъирттал аьпа бавури, ахир – царая тархъан битавури. Хласил, му Рамазан барз шинал дакри,



му саламат бувну, мунил хлурматту бурувчуну, Аллагъ ۞ килл лагавугу, тлаабт-эбадатту чярусса дурну, жамааб-чаклийгу ялув авцлуну, Къуръангу чяруну буклай, мизитраву иьтикаф чяруну дурну, хларамсса, оьккисса задругу къабувну бусурманнан кумаг буллай, дуьрттугу чярусса дурну, садакьарттугу чявусса бувну, ххуйну тлайла буккарча, шалла шингу саламат шайссар, зарал къабивну личлайссар. Му шинаву буцири бунагъиртталу аьпа байссар. Къиямасса Къини му барз ххуйсса суратрай бувкун, Аллагънал ۞ хъхъичл суждалийн багъну, Аллагънахъ ۞ чла чинтиссар цилва хлурмат бурувчумий. Аллагъналгу ۞: «Буца вилва хлак бурувчумий», – чинтиссар. Яла мунил му Рамазан зуруй зума дугълай, мунил хлурмат буручлай бивкмиь ка дургъуну, Аллагънал ۞ хъхъичлун

бувцуну, гайннай хъуншиврул таж биша куну Аллагънахъ ۞ чла куну, бишин бантиссар. Аллагъу Таабланал ца малаик ляхъан увну уссар мукъра лажин дусса, ца лажиндарая ца лажиндарайн бияннин мукъзарда шинал ххуллу бусса. Миннул ца лажин Аллагънайн ۞ суждалийн дагъна дуссар, ца лажин – Аьрцу-р-рахлманнайн дурургун дуь дуллай дуссар, Рамазан зуруй зума дугълай бивкисса Мухаммад идавсил ۞ умматиннал бунагъирттал аьпа ба, рахму ба тий. Цагу – Алжаннавун дурургун дуссар, мивун увхманансса хъинбала чла тий. Цагу – Дуржагъравун дурургун дуссар, гивун увхманан аьзав, оьбала чла тий. Хласил, рамазан зурувусса хъинбаларттугу, барачатшивугу килуссания халкъуннан, шаллара шин му барзну дусса хурдай тлунссия.

Фаризасса зумалул шартлру

Рамазан зуруй фаризасса, чара бакъа дугъан аьркинсса зума ялув шаврингу, шаллу шаврингу цапшара шартлру дуссар:

1. Зума дугъайсса инсан бусурмансса иклавури. Чапурчунал, муртаднал зума хлсав дакъассар.
2. Балугъ хъусса иклавури. Балугъравун къаувхнай зума ялув дакъассар. Амма нитти-буттай ялувссар арулла шин хъусса оьрчлан дугъи куну амру бан. Ацлра шин хъувкун къадугъарча, ришун бучиссар.
3. Щарссанин – хлайз-нифасрая марцлну диклавури. Хлайз нанисса, оьрчл бувсса щарссанил зума хлсав дакъассар марцл хъуннин. Зума дургъуну дуна, хлайз ялун биярча, ягу оьрчл барча, му зумагу къахлсавссар. Мукун лирчлсса зумарду хъирив лахъан аьркинссар.
4. Дугъан каши дусса, къувват дусса иклавури. Хъиннува хъунав хъусса,

заэвсса, къашавайсса, дугъарча чурххан зарал хъанахъисса инсаннай зума ялув дакъассар. Чанкъансса лякъа, бакл цлий бур кунури, ритан къабучиссар. Чак кутла бан бучисса, лахъисса ссапарданий нанисса инсаннайгу ялув дакъассар, ритан бучиссар, яла хъирив лахъанссар. Му сапарданий дугъарийну, чанссавагу чурххан зарал хъанай, заэв хъанай ухъурча, дугъавунир ритаву хъинссар. Къахъанай бухъурчарив, дугъаву ххирассар. Лякълуву оьрчл бусса, ккуккуллий ттихъайсса оьрчл бусса щарссанингу ритан ххуллу буссар, я цинма, я оьрчлан дугъавриву зарал хъанай бухъурча. Мукунма, ца гъалак хъуну нанисса хлайван ягу инсан ххассал аншиврулгу ритан дуруссар, цамур куцуй ххассал ан къабюхълай бухъурча, масала, хъхъиривун оьклай, ягу неххал лавсун най, ягу

цамур мукунсса савав духъурча. Фаризасса зума дугъайсса инсаннал хъхъурайра нийят дан аьркинссар. Мунил члунгу – баргъ лавгун махъ чани дукканнин. Я мунир хъхъичл, я мунир махъ дурну къахлсавссар. Хлатта, чивисса оьрчлал зума дугъантлий ухъурчагу, муналгу нийят дан аьркинссар. Му цумал нийят дан къархъуну, хъама риргун личларча, му зума къахлсавссар, хъирив лахъан аьркинссар. Амма му къинигу дукра дукан къабучиссар. Щалва барз дугъан куну Рамазан зурул хъхъичлра-хъхъичлсса хъхууну нийят дарчагу, нийят дан хъама риртсса къини дургъусса зума мунийну шаллу шайссар. Му нийят дайсса куцугу: «Нийят дурунни на зума дугъан гъунтгий ва шинал Рамазан зурул фарийза тлайла буккавриятуса, Аллагъу Акбар» – куну данссар.

Зумалул журадлу

Исламрал рукнурдава мукъилчинмур рукну – Рамазан барз бугъавури. Гъарца цилла шартлрдацал, рукнурдацал, адабиртгашал, къамул хъунсса куцуй щаллуну Рамазан барз къабугъайсса инсаннал Ислам барт къалагайссар. Зума дугъавугу шанна куцуйсса дуссар: шаръ-эйсса, тарикхийсса, хлакхийсса.

Шаръэйсса зума – шинал цал бучлайсса Рамазан барз бугъавури: дукра къадуркуну, хлачия къахларчлуну, цайми зума зия дайсса зад къадурну. Му зума ялув даврил хлкматту – Адам идавс ۞ Алжаннавун авкъукун, миву мадукара увкусса мурхъирая ахъллсса дуркуну, мунал лякълуву зувица гъантлий ливчлссар му бувкусса лукъмалул асар. Яла Адамлул ۞ тавба дурну, Аллагъналгу ۞ къамул дурну махъ, Аллагъу Таабланал амру бувссар зувица хъху-къини зума дургъуну иклу, зад мадукара куну, му мурхъирая дуркусса задрал асар гъаннин. Мунал наслулийгу ялув бувссар мукунма шинал зувица гъантта бугъан, хъху-къини цал дакъа зад къадуркуну. Яла Аллагъу Таабланал, Мухаммадлул ۞ умматиннан бигъа бан, дяхтта дугъан хъхъурай дитан амру бувссар. Ялагу, му ялув даврил хлкмат – Аллагъу Таабланал инсаннал чурх-нафс ляхъан бувукун, мунихъ цлвухъуссар: «На цура, ина цура?» – куну. Чурххал увкуссар: «Ина ина ура, на на бура» – куну. Аллагъу Таабланал мунир аьзав дуллуссар ттуршра шинал Дуржагърал царайну. Яла буккан бувну царавату суал бувссар цлунил. Жаваб дуллуну дур гара кцуй. Ялагу ттуршра шинал ккашил цларавун бавкъуссар. Ялагу буккан бувну суал бувссар: «Ина цура, на цура?» – куну. Яла увкуссар му чурххал: «Ина ттул Аллагъра, на Вил лагъра» – куну, икьрал дурну, муклру хъуссар. Мукун, ккашийну бакъа инсаннал чурх мютий къавхъуну тий, ялув дурссар зума. Масъала, инсаннал чурх цинма ччикун, ччитари цинна ччимур дукрагу канай, дакту къанкъа хъуну, Аллагъу ۞ дакнин къаагълай, хлусудшивугу зияда хъуну, му аьйкъин ан щяйтлан буххайсса чурххавунсса ххуллурдугу гъарта хъуну, бунагърал увцлуну иклайссар. Му чурх зума дугълай ккашил бувукун, дакту килулу хъуну, хлусудшивугу яла ларгун, Аллагъ ۞ дакнин агъну, мунайн тавбалийн клура авну, бунагърая марцл шайссар. Мунал чурххавун му аьйкъин ан буххайсса ххуллурдугу къума хъуну, бавшуну, щяйтланнун къалякъайссар. Тарикхийсса зума – цалва гъарца базу хлараммуният, Заннал ۞ мадувара увкумуният бугъавури, яру хларамсса задирах бургаврияту буруччавури, маз гъибат-бугъандалия, щялмахърая, миннуха лавхъхъусса цайми задирттаяту буруччавури. Мукунма, вичи оьккисса задрах вичлидишаврияту дуруччавури, ка щинчлав зарал баврияту дуруччавури, ччан хларамсса кланайн бачаврияту буруччавури. Мукунма, гъарца базу хлараммуният буруччавури. Гъарца риягърая (ккаккилун дуллалаву), сумагърая (машгъур хъуну ччаву), хлусудшивруя, такабуршивруя (дак хъуншиву), миннун лавхъхъусса цайми къовкъусса тлудлаяту марцлну иклавури. Му тарикхийсса зумалулгу ца члун дакъассар, дургъуна икланссар. Мугу салихсса, эбадат дуллалисса лагътурал даражари. Хлакхийсса зума – цалла дак дуруччавури Аллагъ ۞ акъасса цамур зад ччаврияту, дунияллул пикрирдаят, оьккисса ниятраят. Хъус, хъуншиву, Аллагъ ۞ акъа цамур зад ччива куну дакнин багъаврияту айшавури. Мугу идавстурал, сиддикьинтурал, Аллагъначан ۞ гъанминнал даражари.

Зума дугъаврил ссуннату ва карагъатру

Зума дугъайсса инсаннал кӀюрххилсса дукаву ссуннатссар, цуксса чансса дукарчагу, ца ххув щинал чирчагу, къадуркуна дугъавунияр хъинссар.

ДачӀра, зад къадуркуну дугъавугу карагъатссар, къахъинссар. ЖугъутӀнал ва хач-параснал зумалулгу жулла зумалулгу дянивсса личишиву мунийнури дусса. КӀюрххил чаклил чӀун дияннин чансса хъхъичи дуркуну, къацӀгу марцӀ баву хъинссар. Канай, къацӀливу зад дуна чӀун диярча, мугълат бакъа къатӀув личин данссар. Мукун барча му зума хӀисавссар. Чани бувкривав, къабукривав тӀий щак хъурчагу, къадукаву хъинссар. Щарссанищал утту ивхъуну махъ чурх шюшин ялвума чани букканнин щинавун учӀавугу хъинссар, амма махъ учӀарчагу зарал бакъассар.

Баргъ лавгшиву мийжан шайху гацӀана зума ритавугу суннатссар. ХӀатта, маркӀачан чак баннин зад дукавугума хъинссар. Чассагуй ритавугу суннатссар. Му бакъахъурча щинай хъинссар. Амма ва заманнаву щинай ритаву суннатссар тӀийгу бур, цанчирча, мунияр шубгъа бакъасса, хӀалалсса хъус дакъанутӀий. Зума дитайний: «Аллагъумма лака сумту ва аьла ризкьика афтӀарту» – учаву хъинссар.

Цама зума дургъусса инсаннал зума ритансса зад дулавугу суннатссар. Мунал дургъусса зумалул чириксса чир цанмагу бикӀайссар. Зума дургъусса адаминал, оь бищаву (хӀижама, кровопускание), ахттая махъ сивак дуккаву, хӀаммамравун уххаву, чӀявусса шанашаву къахъинссар. Шагъватрай хъаннин ургаву, щарссанищал ппай тӀий хъярч-махсара буллалаву – хӀарамри. Дукра ккюхӀаву, ккарчӀулоьчи ккюхӀаву, къункъув, зумув щин ларсун хъиннура гивуннай диян даву къахъинссар. НахӀусса, къанкъ дусса задрин ссунтӀ учаву, дукралуха зузаву, дукаймуних уругаву къахъинссар.

Щялмукъуя, гъибатрая, мюнпат бакъасса, оьккисса каламрая маз бурувчуну икӀаву хъинссар. Цахъва цама карагъатсса ихтилат буллай гъалгъа тӀисса ухъурчагу, на зума дургъуну ура куну, мунаяту арх хъунссар. Цаймицайми хӀарамсса, карагъатсса иширттаяту урувчуну икӀаву хъинссар. Гъарца базугу оьккисса задирттаяту буруччин ялвуссар.

Цикссагу халкъ, зума дугъаврияту бачӀва ккашил шавугу, мякъ шавугу дакъа, цукунчӀавсса чир къашайсса!

Зума зия даймур

Зума зия хъуну личӀайссар кӀюрххил чаннал асар хӀисав хъанан бивкӀун махъ, баргъ лавгшиву мийжан хъуннин лякълувун зад гъарча, ча гъарчагу, зумух гъарчагу, къункъух, вичӀилувух, бакӀравун гъарчагу, аьвратравун гъарчагу, мукъахун гъарчагу, ХӀатта, тӀагъарат байний, кӀиссурал бакӀ мукъахаллил вив гъарчагу зия шайссар. ЩарссаничӀа утту ивхъуну шариаьт барчагу зия шайссар. Щарсса хӀайз хъурча, оьрчӀ барча, личӀайссар. Ахпув, ххян зумув дурккун махъ, зана риртун махъуннай дюкьарча зия шайссар. Амма, къакъарт-тул бакӀраятра дюкьарча зия къашайс-

сар. Къасттирай кӀарчӀ учирчагу зия шайссар, цала ихтияр дакъана учирчарив, къаличӀайссар. ЧӀюмпи дюкьав-кватӀув дурккун махъ дюкьарчарив, зия шайссар. Чаклийн иссайний къункъув, зумув щин ларсун вив гъан дарча, карчӀаншиву дурну, хъиннура гивуннай диян дуллай уна гъарча – зия шайссар, акъахъурча къашайссар. Фаризасса гъуслу бан чурх шюшлай унува, цакуну вичӀавух, къункъух, зумух вив щин гъарча зума зия къашайссар, суннатсса гъуслу буллай унува цакуну гъарчагу зума зия шайссар.

Амма укунма марцӀшиврун, дюхлул-шиврун чурх шюшлай унува, цакуну вив щин гъарча, зума зия шайссар. Къалиян учаврийнугу зума зия шайссар. Къасттирай ккарчӀчухунсса дюкьарчагу зия шайссар.

Гужрай зад дукан арча, хӀачӀан арча, ягу увгъуну зумух рутӀирча зия къашайссар. Зума дургъушиву къакӀулну, хъама риртун зад дукарча, ягу хӀачӀия хӀачӀарча зума зия къашайссар, циксса дукарчагу. Мукунма, хъама бивтун цамур зума зия дайсса зад барчагу зума зия къашайссар.

ТаравихӀ-чак

ТаравихӀ-чак – Рамазан зуруй хъатӀан чак бувну махъ байсса суннатсса чакри. Му чак Рамазан зуруй гъарца хъхъуну байссар, гъунтти зума дугъан тӀисса хъхъуну байбивхъуну. ТаравихӀрал чак жамааьтращал мизитраву баву хъинссар. Агарда мукун бюхълай бакъахъурча, шаппа кулпатращал, чӀаххуращал буванссар. Мукунгу бюхълай бакъахъурча, бучӀиссар цалвалу бангу. Му цуппагу гужсса, цаьк бувсса суннатри (суннатун-муаккада), Жула Идавсту ﷺ ялвув авцӀуну, лях къакъабитлай буллай ивкӀиссар. Мунихсса чиригу хъинну хъунмассар.

ТаравихӀ-чаклил мийра ракааьт дувайссар, кӀи-кӀира ракааьт дуллай салам буллай. Бувну къуртал хъувкун, шанна ракааьтрайсса витрулул чакгу байссар, цал кӀира ракааьтрайсса чак бувну, яла ца ракааьтрайсса бувну.

ТаравихӀ-чак баврил низам

ТаравихӀ-чак байссар мукъва, кӀи-кӀира ракааьт дусса чакру буллай, миннул дянив дуаьртту дуклай. Мий дуаьртту яларай чирчуну дуссар.

1. ХъатӀан чак бувну махъ, суннатсса ратибат-чакгу бувну цалчинмур дуаь дуккайсар.
2. Цалчинмур таравихӀ-чак бувайссар.
3. Цалчинмур дуаь дуккайсар.
4. КӀилчинмур таравихӀ-чак бувайссар.
5. Цал кӀилчинмур дуаь дуккайссар, яла цалчинмур дуаь дуккайссар.
6. Шамулчинмур таравихӀ-чак бувайссар.
7. Цалчинмур дуаь дуккайссар.
8. Мукъулчинмур таравихӀ-чак бувайссар.
9. Цал кӀилчинмур дуаь дуккайссар, яла цалчинмур дуаь дуккайссар.
10. КӀира ракааьт витрулул чаклил дувайссар.
11. Цалчинмур дуаь дуккайссар.
12. Ца ракааьт витрулул чаклил дувайссар.
13. Шамулчинмур дуаь дуккайссар.

ТаравихӀ-чак буллалини дуккайсса дуаьртту

Дуаь №1. Ла хӀавла ва ла къуввата илла биллагъ. Аллагъумма салли аьла МухӀаммадин ва аьла али МухӀаммадин ва саллим. Аллагъумма инна насъалукаль-джанната фа-наоьзубика мина-нар.

لَا حَوْلَ وَلَا قُوَّةَ إِلَّا بِاللَّهِ
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ وَسَلِّمْ
اللَّهُمَّ إِنَّا نَسْأَلُكَ الْجَنَّةَ فَتَنْعُوذُ بِكَ مِنَ النَّارِ

Дуаь №2. «СубхӀаналлагъи ва-ль-



хӀамдулиллагъи ва ла илагъа иллаллагъу валлагъу акбар. СубхӀаналлагъи аьдада халкъигъи ва риза-а нафсигъи ва зината аьршигъи ва мидада калиматигъ». (3-лла)

سُبْحَانَ اللَّهِ وَالْحَمْدُ لِلَّهِ وَلَا إِلَهَ إِلَّا اللَّهُ وَاللَّهُ أَكْبَرُ
سُبْحَانَ اللَّهِ عَدَدَ خَلْقِهِ وَرِضَاءِ نَفْسِهِ وَزِينَةَ عَرْشِهِ
وَمِدَادِ كَلِمَاتِهِ

Дуаь №3. «СубхӀана-ль-маликиль-къуддус. СубхӀана-ль-маликиль-къуддус. СубхӀаналлагъи-ль-маликиль-къуддус, суббухӀун-къуддус, рабул малаикати ва-р-рухӀ. СубхӀана ман тааьззаза би-ль-къудрати ва-ль-бакъаь ва къагъгъара-ль-эбада би-ль-мавти ва-ль-фанаь. СубхӀана раббика рабби-ль-эззати аьмма ясифун ва саламун аьла-ль-мурсалина ва-ль-хӀамду лиллагъи раббилъ-аьламин».

سُبْحَانَ الْمَلِكِ الْقُدُّوسِ سُبْحَانَ الْمَلِكِ الْقُدُّوسِ
سُبْحَانَ اللَّهِ الْمَلِكِ الْقُدُّوسِ سُبُّوحٌ قُدُّوسٌ رَبُّ

الْمَلَائِكَةِ وَالرُّوحِ سُبْحَانَ مَنْ تَعَزَّزَ بِالْقُدْرَةِ وَ
الْبَقَاءِ وَفَهَّرَ الْعِبَادَ بِالْمَوْتِ وَالْفَنَاءِ سُبْحَانَ رَبِّكَ
رَبِّ الْعِزَّةِ عَمَّا يَصِفُونَ وَسَلَامٌ عَلَى الْمُرْسَلِينَ وَ
الْحَمْدُ لِلَّهِ رَبِّ الْعَالَمِينَ

Ялвув чирчусса цинярдагу дуаьрду дуккайссар лахъну, бюхтгулсса чӀуний цинявнналагу архӀал. Гай дуаьртту къуртал хъуну махъ дуккайссар хъиривсса дуаь:

«Аллагъумма инни аоьзу биризака мин сахатӀика ва бимуаьфатика мин оькьубатика ва бика минка ля ухӀси санааьн аьлайка анта кама аснайта аьла нафсик».

اللَّهُمَّ إِنِّي أَعُوذُ بِرِضَاكَ مِنْ سَخَطِكَ وَبِمُعَافَاتِكَ
مِنْ عِقَابِكَ وَبِكَ مِنْكَ لَا أَحْصِي ثَنَاءً عَلَيْكَ أَنْتَ
كَمَا أَثْنَيْتَ عَلَيَّ نَفْسِكَ

Рамазан барз бачӀи хъувкун, витрулул чаклил махъра-махъсса ракааьтраву «Магъдина» дурккуну хъинссар.

Лайлатул-Къадрилул хъхъу

АцІния кІивагу зурдардиву яла ххирамур, даража лаваймур барз – Рамазан барзри. Мунил хъхъурдардива яла ххирамур хъхъугу – Лайлатул-Къадрилул хъхъури. Мугу Рамазан зуруй цумур хъхъу дуссарив мйяжанну къакІулссар. Куннал хъхъичІра-хъхъичІсса хъхъури тІар, куннал ацІния арулку хъхъури тІар, куннал махъсса ацІрагу хъхъурдардиву дуссар тІар. Миннугу я къуния цалчинмурди, я къуния шамулчинмурди, я къуния арулчинмурди, я къуния урчІулчинмурди тІий бур.

Кунналгу тІий бур, Рамазан барз аьлхат хъхъуну байбиширча, къуния урчІулку хъхъу дикІайссар, итни хъхъуну байбиширча, къуния цаку хъхъу дикІайссар. тталат хъхъуну байбиширча – къуния арулку хъхъу дикІайссар, арвахІ хъхъуну байбиширча – къуния урчІулку хъхъу дикІайссар, ххамис хъхъу байбиширча – къуния ххюку хъхъу дикІайссар, нюжмар хъхъуну байбиширча – къуния арулку хъхъу дикІайссар, ххуллун хъхъуну байбиширча – къуния шамулку хъхъу дикІайссар тІий. ХІасил, Аллагъу Тааьланал му кІул къадурну, къюлтІ дурсагу, хъхъурду утгара дуллаи, жунма чири хъунмасса хъуншиврулли. Лайлатул-къадри дикІайсса хъхъунил лишангу: му хъхъу я хъиннура дяркъусса, я хъиннура гьелисса дакъа, дьнивсса, паракъатсса хъхъу дикІайссар. Хъхъурай Лайлатул-къадри диркІун, кІюрххил буккайсса баргъгу кІялану, нур чаннану бикІайссар. Му чІумал гьарца задрал, уртту-щинал, аьрщи-чарил Аллагънайн ﷺ сужда байссар. Му хъхъуну ккаччил хІапгу къачайссар, тІар. Лайлатул-къадрилул хъхъуну Аллагъу Тааьланал му шинаву, дунияллийн, халкъунавун багъантІисса амрунду, хІукмурду, къазаьру гьарца инсантурал, жиндардил, хІайвантрал, ушущулгъилул дуканмур, хІачанмур,



данмур, дитанмур, хІатта гьарцаннил зумату дуккантІисса жуав, бигъинтІисса ссихІ, ласунтІисса ша, миннал ризкъирду, ажаллу, аьмаллу, ивчІантІима, къашай хъунтІима, хъин хъунтІима, му шинаву лачІунтІицири гьарал, бантІицири марххала, бишунтІицири марч, хъунтІицири дяркъу, дикІантІицири кІиришиву, ххяххантІицири уртту, къама, ахъулсса, гьарца му шинаву хІасул хъунтІисса ишру, хІукмурду къадар буну азалданува лавсун дафтар-чичрурду дувайссар. РахІматрал, аьзаврал, миннуха лархъхъуминнул дафтар Жабраил малаикнахъхъун булайссар. Уртту-щинал, бакІлахърулул, миннуха лархъхъумунил дафтар Микаил малаикнахъхъун булайссар. Гьарал, дякъил, мурчал, бургъил дафтар Исафил малаикнахъхъун булайссар. Къашайшиврул, ивчІаврил, мукуминнул дафтар Изрияиллухъхъун булайссар. Ми малаиктуралгу Аллагънал ﷺ хІукмурду бачин байссар. Утти, му Лайлатул-Къадри тІалав дан ччарча, му дикІайссар тІисса хъхъурду

утгара давугу суннатссар, хъунмасса даража буссар. Хаснува мизитраву иьтикафраи авцІуну зикри буллаи, чакру буллаи, дуаьртту дуллаи, Заннайн леххаву тІий икІаву хъинссар. Мукун чансса бунугу бувсса салихІсса, хъинсса аьмал АллагъначІа ﷺ азарва цайми зурдардий бувсса аьмалнир хъинссар. Лайлатул-Къадри дуаьлухъхъун жаваб дулайсса хъхъури. Му хъхъуну чІявуну – «Аллагъумма иннака аьфуввун, тухІиббул аьфва, фьаьфу аьнни» – учаву хъинссар, жаваб дулаврил сьятравун тІайла бавцІуну, жаваб дулун бюхъайссар. Му хъхъуну кІира ракааьт чаклил дарча, «альхІамрал» хъирир ару-аруйла «къулгъугу» бувккуну, ссалам буллукун арулцІарийла «Астагъфируллагъ ва атубу илайгъи»-гу увкуну, муналгу, мунал нитти-бутталгу бунагъру шошайссар, Алжаннаву хъунмасса неьмат, чІюлушиннагу хІадур дайссар. ИвчІайний цанма Алжаннаву хІадур бувсса неьмат-кІану чІалану бикІайссар. Му хъхъуну шамийла – «Ля илягъа илля Ллагъу МухІаммадун-Расулюллагъ» чирча,

цаннихлу – мунал бунагъирттал аьпа байссар, цаннихлу – дуржагърая хассал айссар, цаннихлу – Алжаннавун уххайссар. ХІасил, му хъхъуну ца чансса хІаллайвагу эбадат дуллаи ацІарча, мунил даража АллагъначІа ﷺ хъинну хъунмассар.

Му хъхъуну, ссавруннайсса малаиктал лухччинийн ликкайссар. Ссавнил хъулурду тІитІайссар. Жабраиллул кІирагу нурданул хъару машрикь-райнгу, магърибрайнгу дияннин халкъунал ялтту тІитІи дакъайссар. Му хъхъуну ссаврунная ца цими ликкайссар, му цими Жабраиллул гьарца утгавасса икІу, ивкІусса икІу, муьминтурайх бачІайссар. Миннан биал хъуну ххишаламур щин булуви куну Жабраиллул Аллагънахъ ﷺ суал байссар. Аллагъналгу ﷺ му хъхъуну бувсса оьрчІан була чайссар, чапуртурал оьрчІру бухурчагу, мунийну, мий чапуртурал оьрчІру бусурманшиврий литІайссар – куну. Ялагу му хъхъуну ссаврунная мукъва ттугъ ликкайссар ца-цаннишал арулцІала малаикту аьрхІалну. Ца – ливауль-хІамд тІисса ца даврил ттугъ, ца – ливау-рахІмат тІисса рахІму баврил ттугъ, ца – ливауль-карамат тІисса хъуншиврул ттугъ, ца – ливауль-магъфират тІисса аьфву баврил ттугъ. Гьарцаннийгу чивнуну буссар: «Ля илягъа илля Ллагъу МухІаммадун-Расулюллагъ». ХІамдирал ттугъ бищайссар ссавнил ва лухччинул дянив. РахІматрал ттугъ бищайссар Къябаллий, караматрал ттугъ бищайссар Байтул-мукъаддаслив. Аьфву баврил ттугъ бищайссар МухІаммад идавсил ﷺ гьаттай. Ми малаиктуралгу гьарца хъунаавкъусса муьминчунахъхъун ссалам булайссар. Миннал къатравунгу бувхун, шанакъашиманакъхъунгу ссалам булайссар. Аллагъ ﷺ кІицІ лаглагиманакъхъун Жабраиллул ссалам булайссар. Чак буллалиманакъхъун Аллагънал ﷺ ссалам булайссар. Му хъхъуну, чани хъуннин, мукун ссалам буллаи бикІайссар мий малаиктал.

Зума ритавал байран

Аллагъу Тааьланал Зума ритавал къини даврин савав – ахиратлул къини дакІнин дагъаншиврулли. Муниргу учайссар Эдрал къини, куну. Гьарца Эдрал къини дуркІукун, дунияллий халкъ кув ххарину, кув пашманну, кув ххуйсса канай, ххуйсса ларххун, кув оьккисса канай, оьккисса ларххун, кув бахътта, кув бурттий, кув аьтІий, кув хъяй бикІайсса кунма, Къиямасса Къинигу мукун бикІантІиссар.

ХІатта, муьминчувнал эдрал къинирду му дакъасса, ххюра цаймигу дуссар. Ца – цалва бунагъ къабуну, муния марцІну ларгсса къинири. Цагу – шагъадат дуртун Имандалий ивкІусса къинири. Цагу – ссиратІрал ламу лавхъун ххассал хъусса къинири. Цагу – Дуржагърая хассал хъусса, Алжаннавун увхсса къинири. Цагу – му неьмат цанма буллусса Аллагъ ﷺ ккавккун, мунах урувгсса къинири – яла хъунмур Эдрал къини мури. Му къини дакъа муьминчувнан рахІматшивугу дакъассар. Зума ритавал Эдрал къинигу хъинну

ххирасса къинири. ХІатта, Аллагъу Тааьланал Алжан му къинири ляхъан бувсса. Туба тІисса Алжаннавусса яла хъунмур мурхъ му къинири бившусса. Жабраил малаик вахІгъюшиврин увчІусса му къинири. Мунивусса фазиларду, хъиншивуртту чІяруссар. Му къини хъинсса аьмал баву, Аллагъ ﷺ чІявуну кІицІ лагаву хъинссар. Дуаьлухъхъун жаваб дулайсса, аьфву байсса, Аллагъ ﷺ цимилийну ургайсса къинири. Рамазан зурул махъра махъсса къини баргъ лавгун махъ, байрандалул лишан загъир дуваншиврул, Эдрал чак булланнин, кІичІиртгаву, мизитиртгаву, къатраву, чу бухурчагу, такбирду учавугу суннатссар, лахъну, бюхттулну оьвкуну. Му такбиргу бишайссар «Аллагъу акбар, Аллагъу акбар, Аллагъу акбар. Ля илягъа илляЛлагъу ваЛлагъу акбар. Аллагъу акбар ва лиЛлагъил хІамд», – куну. Му хъхъу утгара давугу хъинссар, шанан къаивкІун, тІааьт-эбадат дуллаи, Кьуръан буклай, зикри-салават ккалай. Щалла хъхъу мукун гъан дан къабюхъайманал, мунил хъунмур чІун эбадатрай гъан дувача. Мугу къа-

бюхъайманал ца сьятту дурну, хъатІан чак ва кІюрххил чак жамааьтрай бан хІарачат бувача. КІюрххил Эдрал чаклин ачиннин чурх шовшюну, марцІшиву дурну, ххаллилсса янна лаххаву, нахІусса къанкъ даву суннатссар. Байрандалул къини чак баннин мукътуршва: «Ля илягъа илля Ллагъу вахІдагъу ля шарика лагъу, лагъул мулку, ва лагъул-хІамду юхІгъи ва юмиту ва гъува аьла кулли шайин къадир» учирча, мукътурша лагъ тархъан ивтссаксса чири буссар, цайми лавайсса даражарттугу буссар. Эдрал хъхъу дуркІукун, гьарца ливтІусса муьминтурал рухІру ссаврунная лухччинийн лирккун, цалла къатрал лагма щя диркІун, лагмара ккуранну дурну оьвтІун дикІайссар, инсантуран къабаярчагу: «Жугу зу кунма дунияллий вай къатрал, ми хъуслил заллухъруну бивкІуссару, жугу дакІнийн багъияра, жухлуну садакъагу бувара, жул гьаттайн зияратту бувара, жунгу жува бувсса хъинсса аьмал бакъа къаьлявкъунни» – тІий кІюрххилнин диркІун, яла цалла кІанайн кІура даяйссар. Миннал

гьаттайн зияратту буну, миннахлу садакъагу барча, ххарину тирх тІий лагайссар, къабарча, пашманну лагайссар. Му къини ливтІуминнал гьаттайн зияратту буну, миннаяту садакъагу буну, ххуйсса яннагу ларххун, ххуйсса хІалалсса дукра дурну кулпатрангу, махъминнагун аваданшивугу дурну, кунначІан кув зияратрайнгу лавгун, хІалалшивугу ласаву хъинссар, ссуннатссар. Амма, му къини чІярусса дукра дуркуну, хІан хІарчІун, оьккисса махсартту, хъярчу буллаи, щяйтІан рязий буну, Заннан ﷺ сси бизан баву къахъинссар. ХІатта, гьарца Эдрал къини иблисрал оьвкуну цилва аьрал бавтІун учайссар: «ХІакъину МухІаммад идавсил ﷺ умматиннай цими байсса къинири, зу хІарачат бара, мий дукралухун, хІачІиялухун, махсара-хъярчирахун машхул буну, бунагъру бан буну, Аллагънан ﷺ сси бизан бансса» – куну. Мукун бухъувкун, му къини дукралухун, хІачІиялухун, бунагъиртахун машгъул хъуну, иблис рязий буну дургъусса зумагу зия къадурну, Аллагъ ﷺ рязи хъунсса, хъинсса аьмаллу чІявусса бан аьркинссар.

Зума ритавал кӀини байсса чак

Зума ритавал байрандалул кӀини Эдрал чак баву – Исламрал лишанни, гужсса суннатри (суннатун муаккад). Идавсгу ﷺ ялув авцӀуну буллай ивкӀссар.

Му чак жамааьтрай баву суннат баврил хӀикмат: ххирасса байрандалул кӀини халкъ кунначӀан кув бавтӀун, му чакгу бувну, дакӀругу цацӀун дурну, ххавхмийгу дакӀыл хьуну, хӀалалшивурттугу ларсун ялтту бучӀарча, миннайн АллагӀнал ﷻ цӀими ликкайссар. ХӀатта, муъминчунан лайкъ бакъассар му чаклия ххавхманашал дакӀыл къавхьуну гъан. Байрандалул чак баврил чӀунгу – кӀюрххил баргъ бивну махъ ахттайн бизаннинни. Ххирамур чӀун – баргъ чансса гъаз хьувкунни. Мизитраву бавугу хьинссар. Жамааьт мизитраву къума хъанай бухьурча, авлахърай баву хьинссар. Цалвалу буллай ухьурча, хутӀба къабувна байссар. Цуппагу кӀира ракааьтрай байссар. Байсса куцгу: «На ният дурунни зума ритаврил Эдрал чаклил суннатсса кӀира ракааьт дан хъунасса Заннайн АллагӀу акбар» – куну ният дайссар. Имамнал хьирив буллай ухьурча, имамнал хьирив чинссар. Яла «Важжагъту» дуккинссар. Ялагу «АллагӀу акбар» куну, кару гъазгу дурну, махъуннай хъазамрай дирхьуну «СубхӀаналлагӀи вальхӀамду лиЛлягӀи ва ля илягӀа илляЛлагӀу валлагӀу акбар» учинссар. ХъхьичӀмур ракааьтрай му куцӀуй арулва такбир банссар, цал бувну цал баннин мий махъругу учинтӀиссар. Яла «альхӀам» буккитӀиссар. КӀилчинмунийгу ххӀойлва такбир банссар, гайва махъругу учинссар. Яла «альхӀам» буккинссар. ХъхьичӀмур ракааьтрай «Къаф» ягу «СабихӀисма» буккинссар. КӀилчинмуний «Икътараба» ягу «Гъал атака» буккинссар. Яла салам буллукун, ивзун хутӀба банссар нӀожмьрдуд хутӀба кунмасса. ХъхьичӀмур булланнин урчӀилва «АллагӀу акбар» чинссар, хьиривмур булланнин аруйла учинссар. Му байни азан-къаматгу къаучайссар. Шамийлва «Ассалата жамааьгъ» учинссар. Эдрал чаклийн нанисса адиминал чурх шюшавугу суннатссар. Му гъуслу баврил чӀунгу хъхьу дачӀи хьувкун дучӀайссар. Ххуйсса марцӀсса янна лаххаву, чӀюлу шаву, нахлусса къанкъ даву суннатссар. Мийхьру къукъаву, чурх марцӀ баву суннатссар. КӀюрххилва бучӀавугу суннатссар. Бахътта, хӀаллих бачаву хьинссар. Имамрив, чак бан чӀун хьувкун учӀанссар, учӀайхту бугу булланссар. ХӀатта, имамнал мизитравун увххукун, суннат-чакгума къабанссар. Хъуни хъами бучӀавугу суннатссар, амма чӀюлу къавхьуна бучӀанссар. Чак бувну махъ увкӀсса ххуллийх зану къавхьуну, цамунийх кӀура авну лагавугу суннатссар, чири хъунмассар. Эдрал чак шаппа буллалиманангу цалва кулпатрашал, чӀаххурашал, гъан-маччаминнашал жамааьтрай бувну хьинссар. КӀай дуаьртту къакӀулманал цувалу буллай ухьурча, кӀира ракааьтрайсса суннат чак банссар цанма кӀулсса куцӀуй, Эдрал чак бансса нийятгу дурну.

ФитӀрулул закӀат — СсахӀ

Хъус марцӀ дан хъуслий закӀат ялув бувсса кунма, чурх марцӀ бан, зумалувусса диял-дакъашивуртту кӀучӀ дан, зума АллагӀначӀа ﷻ къамулну лякъин, зума ритавал ссахӀгу ялув бувссар. Лагънал дургъусса зума лухччи-савнил дянив дарцӀуну дикӀайссар, ссахӀ букканнин ссавруннайн къалахълай.

макъала: Хусейн Исламов

ФитӀрулул ссахӀ буккан ялувссар гъарца бусурманчувнаяту – чӀивисса икӀу, хъунасса икӀу, зума дургъусса икӀу, къадургъусса икӀу, Эдрал (зума ритаврил байрамрал) хъхьунугу кӀини цалагу, цалва кулпатралгу дуркуну, ххишала шайсса хъус дусса ухьурча. Мукунма, цайва нафакъа ялувминнаятугу буккан ялувссар – кулпат-щарсса, оьрчӀру, нину-ппу. Му ссахӀ ялув шайссагу байрандалул хъхьуну баргъ лавгукунни. Мунияр махъ ивкӀуманаятугу, мунияр махъ бувсса оьрчӀаятугу буккан ялув бакъассар. СсахӀ буккайнигу нийят дуван аьркинссар: «Нийят дурунни на фаризасса фитӀрулул ссахӀ буккан ттухлува (щарссанихлу, оьрчӀахлу, цама пурман (ихтияр) лавсӀсса инсаннахлу) хъунасса Заннан АллагӀу акбар» – куну. Балугъ къавхьусса оьрчӀаятугу буттал нийятрайну буккайссар. Ппу акъахьурча цама валийнал нийятрайну букканссар. Мугу акъахьурча цаманал щил-бунугу буккан бучӀиссар. Ппу акъасса чӀумал, оьрчӀаяту ниттил буккангу бучӀиссар. Щарссанил, лас шава акъасса чӀумал, мунал хъуслияту, циятува ссахӀ буккангу бучӀиссар, мунал изну бакъанугу. Щарссания изну бакъана ласнал буккангу бучӀиссар. Хъунав хъуманал цама вакил ангу бучӀиссар, цаятува ссахӀ буккан пурман буллуну. Вакилналгу мунаяту буккан куну ният дурну букканссар. СахӀ щалва Рамазан зурул мутталиий буккан ихтияр дуссар, яла хьинмур, суннатмур чӀун – махъва-махъсса кӀини баргъ лавгун махъ, байрандалул кӀини Эдрал чак буллай байбишиннин. БучӀиссар байрандалул кӀини баргъ гъаннин буккангу. Мунияр махъун бутаву хӀарамссар. Мукун ливчӀманал мугълат бакъа хьирив лахъан аьркинссар. СсахӀ бичайссар цува усса кӀанттаву чӀяруну ишла дайсса къаблахърулийну. ЖучӀава Дагъ-устаннай му хъанай бур лачӀа. Жулва мазгъабрайн бувну, ца лачӀал ссахӀ дянивну 2 кило ва 400 грамм хъанахъиссар. Цайми аьлимтурал тӀимунин бувну – 2 кило ва 700 гр. хъанахъиссар, муният, ххишалану хӀисав бувну хьинссар. ЛачӀайну ссахӀ буккан захӀмат хъанай бухьурча, Имам Абу ХӀанифанал мазгъабрайн бувну, арцӀуйну буккан ихтияр дуссар. Абу ХӀанифанал мазгъабрайн бувну, ца ссахӀ 3 кило ва 700 гр хӀисав байссар. Мукун, арцӀуйну буккай ухьурча, нийят данссар: «Ният дурунни на фаризасса фитӀрулул ссахӀ Имам Абу ХӀанифанал мазгъабрайн бувну арцӀуйну буккан ттухлува (щарссанихлу, оьрчӀахлу, цама пурман лавсӀсса инсаннахлу) АллагӀу акбар» – куну.



ФитӀрулул ссахӀ булайссар вай мийва журалул инсантуран:

1. Факьир. Мугу хъанахъиссар я хъус, я касму дакъама. Масала, хъхьу-кӀини ацӀва шагӀилий мюхтаж хъанай уну, кӀива-шанма шагӀи бакъа, цамур хъус дакъасса. Шариатрал элмулухун агъсса, дурккусса аьлимчувугу, дуклакисса мутааьллимгу, факьиртуран хӀисавссар, миннангу булайссар, цивппа циксса хъус дусса бухьурчагу. Цанчирча, касму дуллара, му элмулухун машгъул хьун къашайнутӀий. Амма элму дурккусса унугу халкъуннан мюнпат бакъасса ухьурча, мунал булун къабучӀиссар. 2. Мискин – касму дан шайма, чан-къансса дунугу хъусгу дума, амма диялну дакъасса. Масала, ацӀва шагӀилий мюхтажну уну, хъхьу-кӀини арулва-мийва шагӀи бакъа, цамур хъус дакъасса. 3. Аьмил – ссахӀ батӀавриха, чичавриха, ябавриха, бачӀавриха, булун лайкъма личӀи авриха зузума. Мунал закӀат булайссар дурсса даврихсса харж хӀисаврай. 4. ЦӀуну Ислам къамул дурманангу булунтӀиссар, бусурманшиврий цӀакъ хьуннин. 5. Залуннал хъус дулурча тархъан итанна кусса лагънангу булайссар, му тархъан хъуншиврул аьркинссаксса. 6. Ялуршиннаралун, буржиравун агъманангу булунссар му бурж лахъануксса, так хӀалалну бувсса бурж бухьурча, масала, цалва чурххан, кулпатран аьркин дан, дучӀи дан бурж бувну бивкӀхьурча. Ягу ХӀажлив гъан, зияратрай гъан, гъазаватрай гъан, ягу ххавхмий бакъил бан, хъамал хъамалу бан, мизит бан, ламу бан, ясир увма тархъан ан бувсса бурж бухьурча. Мукунма, цайми хьинбаларттал ххуллий ларсун, буржиравун агъну ивкӀхьурча. Амма бунагъ буллай, исрафшиву дуллай, хӀантту хӀачӀлай, буржирдавун агъманан къабулунссар, амма марцӀну, хӀакъну тавба дарча, пашман хьурча, мунал булун бучӀиссар. 7. Чикъавчуну, харж къабивхьуна, АллагӀнахлуна ﷻ увкӀун нанисса гъазинангу булунтӀиссар, ярагъ, чу, лаххия машин ласунсса, хъус дусса ухьурчагу.

8. ХӀалалсса ссафарданий нанисса мусафирнангу булунссар, канихъ за дакъа ливчӀун ухьурча. Бунагъсса, хӀарамсса сафарданий наниманан къабулунссар. Вай мийва жура бакъасса цайминнан, масъала, ятинтуран ягу къашавайсса инсантуран, кӀай мийвагу журалувун багълай бакъахьурча, ссахӀ булун къабучӀиссар, булурча, му укунмасса садакъалун ккалли хъанахъиссар ва мунийну ссахӀ бичаврил бурж барт къалагӀайссар. Цаннан булавуннир чӀявуссанан буллуну хьинссар. Ми закӀат ласайсса мийвагу журалул халкъ цивппагу бусурмансса бикӀан аьркинссар, чапурчувнан закӀат къабулайссар. Миннавугу аьжизманан, цана гъанманан, дин думанан, хьинманан чан-къансса ххи бан бучӀиссар. МухӀаммад идавсил ﷺ тухумдалиятуманангу булун къабучӀиссар. ХъхьичӀсса шиннардий ци-дунугу савав хъуну къабулунма ливчӀсса ссахӀгу шайкун анаварну хьирив лахъан ялувссар. ФитӀрулул ссахӀ буккан аьркинссар Рамазан зурул махъва-махъсса кӀини баргъ лагӀагӀисса чӀумал цува усса шяраву ягу шагӀрулий. Му шяравусса мискинтурайх, закӀатрал агъулданийх бачӀинссар. Микку закӀатрал агълу бакъахьурча, му цува усса кӀанайн яла гъанмур шар цумур дурив ххал дурну, миккусса мискинтурайх бачӀинссар. Жулва кӀанттаву ссахӀ ласайми яла чӀявуну шанма журалул бакъа къабикӀай: факьиртал, мискинтал ва буржирдавун багъмий (мутааьллиталгу факьиртуравун ккалли байссар). ФитӀрулул ссахӀ щаллуну, къамулну хъунсса куцӀуй бувкун, багъайсса куцӀуй бавчӀусса бусурманчувнан чӀярусса хьиншивуртту дуссар: бунагърая марцӀ шайссар, дуржагърал цӀарая ххассал шайссар, гъаттавату иминну уккайссар, ссиратӀрайх пар куна лахъайссар, хьиншивурттугу шайссар, Идавсил ﷺ шафааьт бияйссар, Алжаннул агълу шайссар, бувсса аьмал къамулну лякӀинтӀиссар, зумалувусса диял-дакъашивуртту мунийну дарзуну, къамулну шайссар.

Лирчесса зумарду хъирив лахъайсса куц

Гъарца бусурманчуннан кѳулну бикѳан аьркинссар хъирив лахъан дуллалисса эбадатту цилла чѳумал дурмургу ца даражалий къадилайшиву. Мунияту учайссар жагъилну унува дурмур хъинссар хъунав хъувкун дурмуниар, куну.

макъала: Камал Сагидов

Мунин бувну, зумагу цила чѳумал дургъуну щаллу дан хѳарачат буван аьркинссар. Хъирив лахъаврийну зумалул бурж яла гъан барчагу, цила чѳумал дургъумунил кунмасса чири къабикѳантѳиссар, цанчирча, гъарца аьмалданул цила чѳун дикѳайнутѳий. Рамазан зуруй зума лирчѳий бачѳайссар цаппара журардай: Цалчинмур жура –Щарссанищал утту ивхъуну зума зия дурсса арамтал. Миннай му зума хъирив лахъавугу кафаратту (штраф) ялувссар. Ца кьини мукун зума зия даврил кафарат хъанахъиссар кѳива зуруй царагу кьини лях къакъадиртун зума дугъаву. Ми кѳива зурувасса царагу кьини лях личѳарча, цѳуницѳа дай-

дишин аьркинссар, ци сававрайну лирчѳун духъурчагу. Мукунсса зума дугъан ният дуллалисса чѳумал «На ният дурунни фаризасса кафаратрал зума дугъан», –куну дайссар. Кафарат бакъассагу, мукун зия хъусса зума цурдагу хъирив лахъан аьркинссар. Рамазан зуруй бакъасса цамур чѳумалсса зума шарссанича утту ивхъуну зия хъуну духъурча, кафарат ялув бакъассар. Агана адимина кѳива зуруй зума дугъан бюхълай акъахъурча, хъинну къашавай уну ягу цамур шариаьтрал къамул дайсса савав дуну, му чѳумал ряхѳала мискинчуннан ца-ца муд (600 гр.) къалмул булун аьркинссар. Къашайшивугу тасттикъ дан аьркинссар бусурмансса, дин дусса духтурнал. Кѳилчинмур жура – хъинну хъунив хъумий ва хъин къашайсса цѳуцѳаврил бугъумий. Миннан зума хъирив лахъан къааьркинссар, так гъарца зума къадургъуну ливчѳисса кьинилух мискинтуран ца-ца муд булун ялувссар. Шамулчинмур жура – льякълуву оьрчѳи бусса ягу кьукку буллалисса оьрчѳиру бусса хъами. Цалва оьрчѳал цѳуллу-

сагъшиврун ниъ дунутѳий зума къадугълай бивкѳхъурча, каши хъувкун, къадиртсса зумагу хъирив лархъун, ца-ца мудгу булун аьркинссар. Агана мукунсса хъамитайпалул так цинма зарал къахъуншиврул зума къадугъарча, мунин зума хъирив лахъан аьркинссар, муд булун ялув бакъассар. Му бакъассагу, зарал бияврил ниъгачѳин хъуннасса духъурча, зума дугъан дурагу къабучѳиссар. Мукунма, цила бакъасса оьрчѳан кьукку буллалисса хъамитайпалухъу дуссар ихтияр зума къадугъан, накѳи кьуркъуну оьрчѳан зарал хъун тѳий чѳалай бухъурча. Мукьилчинмур жура – муд къабуллуну, так лирчѳисса зума хъирив лахъан ялувмий – мигу буссар шанма жура-са: а) Чак ливчѳисса (хѳайз, менструация) ягу оьрчѳи бувну оьту нанисса (нифас) хъами. Миннан зума дугъан хѳарамссар, амма рамазан барз кьуртал шайхтту хъирив лахъан аьркинссар. б) Хѳалалсса, лахъисса, чак кутѳа бан бучѳисса сафарданийсса инсан. Му-

нахъ ихтияр дуссар зума къадугъан. Мунангу рамазан барз лавгун махъ хъирив лахъан аьркинссар. в) Кѳушлилия лавгун, увччу хъуну, аькълу баххана хъуну, яхѳи бан къашайсса куцѳуй хъинну ккашил ягу мякъ хъуну ягу захѳматсса даврий уну, зума къадургъуминнагу хъирив лахъан аьркинссар, муд къабуллунма. Хъюлчинмур жура – цукунчѳавсса савав дакъанура зума къадургъумий. Миннай ялувссар бюхъайсаксса анаварну тавбагу дурну, зума хъирив лахъан. Хъиривмур Рамазан барз бучѳаннин хъирив лахъарча, муд булун къааьркинссар. Гъашинусса рамазан зурул зумарду ялунчѳинмур рамазан зуруйнин хъирив къалархъун личѳарча, гъарца гъантлук ца-ца муд булун аьркинссар. Ялагу ца шиной личѳарча, кѳива муд булун аьркинссар. Му куцѳуй гъарца шинал ца-ца муд ялун шайссар. Чѳярусса шиннардил зумарду лирчѳун, хѳисав дан захѳмат хъанай бухъурча, мунил хѳал кѳулсса имамначѳан, аьлимчуначѳан лавгун хѳисав данссар.

Ницѳавкѳиратусса шайх Сайфуллагъ-Къади

2 « Бувкѳисса инсанталгу дакѳи паракъат дурну, рахѳат бувну, гъан байсса бивкѳиссар. Сайфуллагъ-Къадинал халкъгу хъин байсса бивкѳиссар. Ца кьини ганаѳан бивкѳиссар оьрус хъамитайпа, кьарччи цѳий дурча кумаг ба тѳий. Цѳанма цамур диндалул хъамитайпа бивкѳун тѳий Къурандалиясса сура, аят буккин къахъанай, цибансарив къакѳулну ца ттархъ цѳуцѳлай ивкѳун ур. Ларсун ца чѳирисса тѳаннул цѳалцѳи: «Ма ва диша вила цѳуцѳисса ккарччуй», –увкуссар. Ганилгу тѳаннул цѳалцѳи ларсун дирхъуну дур ккарччуй. Цахъис



Ницѳавкѳрав Сайфуллагъ-Къадинал къатта бивкѳисса кѳанайсса эяллу

хѳаллава ккарччул цѳуцѳаву къадагъну дур. Хъиривмур кьини ххарившиврул бивкѳун бур ца хѳайван лавсун. Сайфуллагъ-Къадиналгу лавсун бивкѳисса хѳайван бивххун, щалва садакъалун бавчѳуну бур. Сайфуллагъ-Къадинал цала диндалул ва элмулуд даража ашкара буллай къаивкѳиссар. Му даража кѳулну бивкѳиссар анжагъ шама муриднан: Къахѳиблиясса Хѳасан-афандинан, Гъазанищлиясса Къамаруддинун ва Хѳарикѳлиясса Къазамбинан. Мунал диндалул элмулуд хъиривчуну хъуссар Къахѳиб тѳисса яруссаннал шяраватусса шайх Хѳасан-Хѳилми. Мий хъунмасса хѳаллай бивкѳиссар диндалул уссурвалну, дусталну. Махъва-махъ хъунабавкъусса чѳумал, Сайфуллагъ-Къадинал мунан дуллуссар шанна тѳарикъатрал шайхшиврул иджаза. Ца чѳумал Ялув Гъазанищуллал шяраваллил жямат бивкѳун бур Сайфуллагъ-Къадиначѳан миннатрай, хѳатталлин ишла дансса аьрщи аьркинну дур тѳий.

Сайфуллагъ-Къади лавгун Ялув Гъазанищалив, урувгун шяраваллил аьрщарахъу, цѳувххуну бур: «Ва щил аьрщир?» –куну. Бувсун бур щил дуссарив. Амма аьрщарал заллунал къадаххан къаст дурну дур. Сайфуллагъ-Къадинал оьвкуну бур Костекраясса шайх Хасбулатлуин. Бувсуну бур ганахъ аьрщарал заллу даххан ччай акъашиву. Хасбулатлул бувну бур гъалгъа аьрщарал залуннащал: «На вин Костеклив миннуар кѳилийну чѳярусса аьрщи дулунна, инагу ттула арсанн ккалли улланна», –куну. Ганаща бювхъуну бур аьрщарал заллу рязи ан. Иш щаллу бувну бур, аьрщигу кѳилийну ххирану дарххуну дур. Сайфуллагъ-Къадинал цала арцугу дулуну, ларсун дур 25 гектар хѳатталлунсса аьрщарал. Машан ларсъсса аьрщарайгу авцѳуну, цала чѳаравсса Хасбулатлун баллай увкуну бур: «Тун ччива ттула къадар бивукун, нава ва кѳанттай увччуну», – куну, щуну аьрщарайн ччангу.

1919-ку шинал Деникѳиннул каьлушиву дуллалисса кѳяла къазахънал лавсун бур Щурагъиял шагъру. Сайфуллагъ-Къадианан анаварну шагърулия гъан аьркинну бивкѳун бур, цанчирча, белоказакнал хѳукму бувну бивкѳиссар шайх увгъуну ивчѳан. Му хѳукму бувшиву кѳул хъуссар Сайфуллагъ-Къадианан хъхъувай чѳалсса чѳумал, цувагу хъинну къашавай шаний унува. Ганал мутааьлимтурал хѳукму бувну бур хъинну къюлтѳину хъхъувай Сайфуллагъ-Къади Щурагъату уккан ан. Амма Жунгутаьливи биявайсса кѳанай Сайфуллагъ-Къади дунияллия лавгссар 1919-ку шинал май зурул ахирданий оьрмулуд 69 шинаву.

Муридтурал маслихѳат бувну, Сайфуллагъ-Къади увччуну ур Ялув Гъазанищлив, цала хѳатталлун ишла дан ларсъсса аьрщарай. Ца-кѳива гъантлува увкѳун ур Костекрая шайх Хасбулат. Хѳатталлив ивсса чѳумал, Сафуллагъ-Къадинал гъав ккарккун махѳаттал хъусса Хасбулатлун дакѳин багъну бур: «Шиккуяхха ванал, аьпабивул, цала уччара куну бивкѳисса. Цалва ккаккан бивсса кѳанай увччуну ур», –куну. Ца Хасбулатлун бакъа му иш кѳулну къабивкѳун бур. Мунийнун Аллагъу Тааьланал ккаккан бувну бур цана ххирасса лагънал караматшиву.

Сайфуллагъ-Къадинал (къ.с.) чѳарав бувччуну бур цаймигу Дагъусттаннал шайхтал, хъунисса аьлимтал, валитал ва муридтал: Мухѳаммад Яьсуби, Мухѳаммад-Аьриф цала кулпатращал, Къамаруддин, Лаченгил-Мухѳаммад, Аьбдуллагъ ва цаймигу. Ванал гъатгата бувну бур зиярат. Ва зиярат хъанайссар нурданул бивцѳусса кѳану. Шинай цалвагу жува биян аьркинссару ва хъунмасса, ххирасса зияратрайн. Гъарца кьини



Ялув Гъазанищливсса Сайфуллагъ-Къадинал зиярат бусса хѳатталлул къану

Ялув Гъазанищуллал хѳатталлив инсантал бур нех дирхъуну занай. Дагъусттаннал аьрщарай циняв миллатирттал, хаснува яруссаннал инсантал бур Сайфуллагъ-Къадинал сурат жиливу, къатлуву, машиналий дирхъуну ядуллай. Гайннан кѳулну бур ганаьтусса барачат цанма нанишиву. Аммарив чѳявуми лакран къакѳулли шайх Сайфуллагъ-Къадинал даража, га цу ивкѳиссарив кѳул бангу анавар буклай бакъар. Ганал цѳа лакраву аьркинссаксса машгъур ну дакъар хѳакьинусса кьинигу. Хѳакъсса шагъиднал бивкѳулийну дуниял къадиртсса шайх Саэд-афандинал увкуссар: «Цинявннан кѳулссар Дагъусттанная бивкѳиву тамансса машгъурсса аьлимтал, элму кѳулшиврул Макка-Мадианалул аьрабнал аьлимтураяр ялтту бивкѳисса. Гъарца аьлимчуннал буссар цанма-цанма лайкъсса даража, амма Хѳасан-Афандинал ва Сайфуллагъ-Къадинал, хъуншиврун ва бусравшиврун лайкъсса кьимат ттуца бищун къахъунссар. Вай инсантал къабивкѳиссания, вайннал чивчусса луттирду къабивкѳиссания, бюхъайсся хѳакьинусса кьинигу жучѳара тѳарикъат къадиѳан. Ча ласунссия тѳарикъат кѳулшиву, ссай бацѳанссия, Къуръангу, хѳадисругу цинявннан бивчѳилай бакъархха. Вай кѳиягу устазнал луттирду жуйнма цѳимилун ливкунни. Жува вайннан буржлувну буссару», –куну.

Аьйшат Хѳажиевал «Лакрал шайхтал, аьлимтал, валиитал» тѳисса луттирава

Зума дургъусса чӀумал ттул синтгава щалла къини обь буклай бия. На цуксса хӀарачат булларчагу, ттуца мий къабюкъан къабювхъунни. Ттул зума хӀисавссарив?

Синтгава буклакисса обь цукунчӀав бацӀан бан бюхълай бакъахъурча, мий бюкъаврийну зума зия къашайссар, шайкун обь къабюкъансса хӀарачат буварча. («Нигъятуль-мухӀтаж»).

ОбьрчӀру цившпа арцу льякӀин бюхълай бухъурча, миннахлу ссахӀ буттал булун бучӀиссарив?

Балугъравун бувхсса обьрчӀал зума ритаврил къини ва хъиривмур хъхъуну дукансса маэшат льякӀин бюхълай бухъурча, миннахлу ссахӀ бичин булун буттай къаялувссар. Аммарив, буттан ччарча обьрчӀахлу закатуль-фитӀр булун, мунахъ ихтияр дуссар обьрчӀая изнугу лавсун булун.

ЧӀун къадирну дунура ссахӀ бичин бучӀиссарив?

Имам аш-Шафиъйнал мазгъабрайн бувну, ссахӀ бичин бучӀиссар Рамазан зурул цалчинмур хъхъуния байбивхъуну. Имам Абу ХӀанифал мазгъабрайн бувну, ацӀра шинал хъхъичӀума бичин бучӀиссар. Имам Маликлул ва Имам АхӀмадлул мазгъабиртайн бувну зума ритаврил къини дучӀан ца ягу кӀива гъантлул хъхъичӀ булун бучӀиссар. («ФатхӀул-Аьллам»).

Зума къадургъуна личӀаврихсса фидья (аьчӀа, штраф) щин булун аьркинссар?

Фидья (600 гр. къалмул) мискинтурун ва факъиртурун дакъа дулун къабучӀиссар, цайминнан закат багъайсса бунугу, фидья дулун къабучӀиссар. Фидья дулун аьркинссар хъунав хъуну унутӀий зума къариртсса инсаннал, хъин дан къашайсса цӀуцӀаву дусса инсаннал. Мукунсса фидья ялувссар льякълуву обьрчӀ бусса хъамитайпалий, ягу обьрчӀ ккуккулий бусса ниттий, обьрчӀал цӀуллу-сагъшиврун нигъачӀаву дунутӀий зума къадургъусса. Мукунма ца озру бакъанува, Рамазан зуруй къариртсса зума хъиривмур Рамазан барз бучӀаннин хъирив къалархъсса инсанналгу булун аьркинссар. («Мугъниль-мухӀтаж»).

Уттигъанну ттул ппу дунияллия лавгунни. Муная лирчӀисса янналун ци бан аьркинссар? БучӀиссарив ми щин-дунугу дулун ягу ччуччин аьркинссарив? Ялагу тӀун бикӀай инсан ивкӀусса къатлуву мукъцӀалва гъантлий чирахъ лавхъун бикӀан аьркинссар тӀий. Мунил хӀакъираву Исламраву ци тӀий буссар??

ИвкӀусса инсаннал янна лаххан бучӀисса тагъарданий духъурча, мискинтурун дулуну хъинссар, ччуччин аьркиншиву дакъассар. МукунцӀалва гъантлий чирахъ лахъавриятугу зарал бакъа, цукунчӀавсса хайр бакъассар, цанчирча, муксса хӀаллай ччувчусса токрах дулусса арцу истрашшаву хъанай дунутӀий. МукунцӀалва, ххюцӀаллий кӀива ва м.ц. гъантрацӀун дархӀусса аьдатирттал ИсламрацӀал дархӀусса цичӀав дакъассар – ми хъанхъиссар жунна дин къакулунутӀий дуллали хъусса аьдатру.

Льякълуву обьрчӀ хъусса хъамитайпалун ХӀажлив гъан бучӀиссарив?

БучӀиссар.

Чак къабайсса инсаннал зумарду хӀисавссарив?

ХӀисавссар, му бусурмансса ухъурча.

Закатуль-фитӀр (ссахӀ) циминнан булун аьркинссар?

БучӀиссар ссахӀ цаннан булунгу, аммарив шама ягу ххишаласса инсантурун булуну хъинссар. («ФатхӀул-Аьллам»).

Нитти-буттал цалва обьрчӀан хъхъичӀва-хъхъичӀи ци лахъхъин бан аьркинссар?

ХъхъичӀва-хъхъичӀи ниттил ва буттал цала обьрчӀан МухӀаммад Идавсил ﷺ обьрмулия, инсан динналува уккан аймуния, Аллагънал ﷻ сипатирттая бусан аьркинссар, мунийну обьрчӀал къюкӀливу иман цӀакъ хъуншиврул. КутӀану бусан Иман тӀисса мукъувун дагъайсса гъарзад лахъхъин дан аьркинссар. Хъирив Исламрал рукнурду: чак баву, зума дугъаву ва м.ц. лахъхъин бан ялувссар. Яла обьрчӀал дакӀурдиву ихӀсан ххи дан хӀарачат бан аьркинссар.

СсахӀ арцуйну булун бучӀиссарив?

Имам Абу ХӀанифал мазгъабрайн бувну ссахӀ арцуйну булун бучӀиссар. Вайми шанма мазгъабрайн бувну къалмуйну бакъа къабучӀиссар. («ФатхӀул-Аьллам»).

ХӀАЖ-2013

ХӀурмат бусса лакрал жамят, уссурвал ва ссурвал! Сакин буллай буру гъашину цала кашилийну ХӀажлив гъан ччисса лакрал группа. ЦӀуххаву дан хъунтӀиссар ва номерданийн обькуну: 8-989-864-32-69

ДУАЪ

ССИ БИВЗУКУН УЧА

اللَّهُمَّ اغْفِرْ لِي ذَنْبِي وَأَذْهَبْ غَيْظَ قَلْبِي وَأَعِزَّنِي مِنَ الشَّيْطَانِ الرَّجِيمِ

Аллагъумма-гъфирли замби ва азгъиб гъайза къальби ва аззни мина-ш-шайтӀани-р-ражим

ХӀурмат бусса уссурвал ва ссурвал! Зунма цӀуххин ччисса, ИсламрацӀун, ШариаьтрацӀун, кулпатрал багъу-бизулуцӀун бавхӀусса ва цаймигу суаллу гъан бан бюхъайссар SMS – райхчин 8-928-580-37-89 номерданийн, ягу 51-85-22 номерданийн обькуну цӀуххин. e-mail: assamlak@mail.ru

Медресе имени шейха Мухаммад-Ариффа и Дагестанский Исламский Университет имени шейха Мухаммад-Ариффа

ОБЪЯВЛЯЮТ ПРИЕМ АБИТУРИЕНТОВ НА ОЧЕРЕДНОЙ 2013/2014 УЧЕБНЫЙ ГОД
Цель обучения – подготовка специалистов со средним и высшим профессиональным религиозным образованием по направлению «культ исламского вероисповедания» квалификации «священнослужитель исламского культа».



Продолжительности обучения:
в Медресе – 3 года;
в Дагестанском исламском университете – 5 лет.

ПЕРЕЧЕНЬ ДОКУМЕНТОВ НЕОБХОДИМЫХ ДЛЯ ПОСТУПЛЕНИЯ:

1. Нотариальная копия документа о среднем общем образовании (поступающим на базе основного общего образования (9 класс.) вместе с нотариальной копией аттестата необходимо представить справку со школы о переходе на семейную форму обучения)
 2. Копия паспорта;
 3. Фотокарточки размером 3/4 в количестве пяти штук;
 4. Медицинская справка Ф 086;
 5. Копия прививочного сертификата Ф 156/у-93;
 6. Рекомендация от преподавателя религиозного обучения либо от руководителя мечети (имама) расположенной по месту жительства абитуриента.
- Прием документов с 1 июня по 17 августа.

Наш адрес: г. Махачкала, ул. Дахадаева, д. 136
Тел.: (8722) 67 55 08; 8 988 294 56 16

Рузнама

Август

Къини	КӀорххил чак	Баргъ букваву	Ахтгайн чак	АхтгакӀун чак	МаркӀачӀан чак	ХъатӀан чак
1	3:37	5:36	12:55	16:52	20:14	21:58
2	3:39	5:37	12:55	16:52	20:13	21:56
4	3:43	5:40	12:55	16:51	20:10	21:53
6	3:47	5:43	12:55	16:50	20:07	21:50
8	3:50	5:45	12:55	16:50	20:05	21:47
10	3:52	5:47	12:54	16:48	20:03	21:42
12	3:55	5:49	12:54	16:47	20:00	21:39
14	3:58	5:50	12:54	16:46	19:58	21:35
16	4:01	5:52	12:53	16:44	19:55	21:30
18	4:05	5:54	12:53	16:43	19:52	21:27
20	4:08	5:56	12:52	16:41	19:48	21:22
22	4:12	5:59	12:52	16:40	19:45	21:18
24	4:14	6:00	12:51	16:38	19:43	21:15
26	4:18	6:02	12:51	16:36	19:39	21:11
28	4:21	6:04	12:50	16:34	19:36	21:06
30	4:25	6:07	12:50	16:33	19:33	21:02